

Gina Maduro di sindicato ABV:

“Contento cu e trabounan cu lo cuminsa ariba hospital”

ORANJESTAD – Presidente di sindicato di enfermero di Aruba, Sra. Gina Maduro ta contento cu porfin a yega asina leu cu ta bay renoba y amplia e hospital. Esaki Maduro a bisa siman pasa ora e tabata presente como representante di e sindicato na e firmamento di e contract pa e construccion. E sindicalista a splica e poblacion a crece y e hospital a bira chikito pa Aruba. E ta kere cu awo cu e proyecto aki Aruba ta bay haya un bunita hospital cu unda por duna un bon servicio na nos comunidad. E planificacion cu tabata tin tras di e proyecto di renovacion y ampliacion di dr. Horacio E. Oduber Hospital tabata uno extenso, segun Maduro. A purba busca pa haya sa necesidad y opinion di esunnan cu ta traha na e momentonan aki den hospital y locual nan kier mira mehora. “Tabata tin participacion completo, amplio, di e personal. E personal a participa y for di prome dia nos como sindicato tambe a par-

ticipa den e proyecto grandi aki. Cada persona a pone di su parti,” Sra. Maduro a enfatisa y tambe, “a revisa cada departamento, comisionnan a wordo forma y asina cada ken a duna di nan parti. Esaki a sosode hunto cu staf medico y demas experto cu tin na hospital cu a bin hunto pa asina esaki a bira un realidad.”

“Renobacion a tarda”

Pa decadanan caba a papia cu hospital mester wordo renoba, pero nunca a yega mas leu cu si mester muda of renoba. Bou di Gabinete Mike Eman I a cuminsa pa prome biaha un inventarisacion concreto di e necesidad y posibilidad pa e tipo di modernisacion cu Dr. Horacio E. Oduber tin mester. Sra. Maduro a indica cu e renovacion a tarda hopi, “pa basta aña nos ta wardando e proyecto aki y mi tin di bisa cu nos, trahadonan di hospital, ta contento cu esaki ta bay wordo realisa y cu pronto por cuminsa cu e parti di construccion di hospital nobo. Y mi ta kere cu esaki

ta algo pa henter comunidad di Aruba, cu nos por tin un joya di hospital den Caribe cu e hospital nobo aki.”

Menos efecto pa por keda opera

Pa haci, particularmente, e renovacion posibel, a traha un planificacion amplio di mudamento departamentonan durante e proceso di modernisacion. E meta principal ta pa e proceso tin menos efecto cu ta posibel riba e operacion di e hospital y e pashentnan. ABV a enfatisa: “Bo por imagina cu ta bay tin un renovacion di e hospital cu ta keda opera. Ta bay tin mudamento di departamentonan, pero tin plannan traha y gruponan forma cu ta bay organisa e mudamento di un departamento pa otro te ora cu e por wordo finalisa.” Sra. Maduro a finalisa bisando cu mester di tur hende pa yuda coopera y ta kere cu pueblo tambe mester tin pasenshi pa cu tur e procesonan aki cu mester tuma luga, pero unabes e keda cla, “Aruba lo bay haya un joya di hospital” □

